



ATASSUT INATSIARTUNI

ATASSUT

UKA 2013/8-1

Gerhardt Petersen

01.10.2013

Inatsisartut ilassutitut aningaasaliissutissatut 2012 siunnersuutaat

(Aningaasaqarnermut Nunamullu Namminermt Naalakkersuisoq)

2012-mut tunngatillugu ilassutitut aningaasaliissutissatut siunnersuut ATASSUT-mit qimerlooreerlugu siullermeerneqarnerani makkuninnga oqaaseqaateqassaagut:

Siullermik Inatsisartut Aningaasaqarnermut Akileraartarnermullu Ataatsimiititaliaat qujaffigissavarput Inatsisartut sinnerlugit Naalakkersuisut aningaasanik aqutsinerannut nakkutilliilluarlunilu pisariaqarfiatigut uparuaaginnarani aamma iluarsisooqarnissaanik ujartuilluartarsimammat.

2012-mummi ilassutitut aningaasaliissutissatut siunnersuutip qimerloornerani aammalu Aningaasanut Inatsimmi Inatsisartut aalajangiuteriigaasa saniatigut aningaasaliissutinik nikisiterinissamik aammalu aningaasaliissutaasut ilaneqarnissaannik kiisalu nutaamik aningaasaliisooqarnissamik qinnuteqaatit sukumiilluinnartumik amerlanertigullu ataatsimoorluinnartumik suliarineqartarsimasut Ataatsimiititaliap tamanut saqqummiuttagaani takuneqarsinnaavoq.

ATASSUT-mit maluginiarparput kingumut Naalakkersuisut eqqaasinneqaqattaartariaqarsimasut Missingersuusiornermut inatsimmi § 1 Imm. 3. tassalu aningaasaliissuteqarnissamik sioqqutsisumik akuersissuteqartoqareertinnagu aningaasartuuteqarnanilu aningaasanik atuisoqarsinnaanngitsoq.

ATASSUT-mit Aningaasaqarnermut Akileraartarnermullu ataatsimiititaliaq taperserlugu tamanna erseqqissarparput, pingaaruteqarluinnarmat ukiuni makkunani inuuffigisatsinni aammalu siunissami qaninnermi ungasinnermilu nunatta aningaasatigut aqunneqarnera aalajangiisuulluinnartussaammat



ATASSUT INATSISARTUNI

patajaatsumik, innuttaasunut iluaqutaasumik minnerunngitsumillu siunissamut eqqanaarinnittumik ingerlatsisoqarnissaa pisariaqarlunnarmat.

Nalunngilarput manna siunnersuut kingumut qiviarluni aammalu pereersut allanngortinneqarsinnaanngitsut tunngavigalugit aalajangiunneqartussaasoq, taamaattorli aamma pereersut ilinniarfiusarmata pinngitsoorumanngilagut taamatut erseqqissaateqassalluta.

Siunertat suulluunniit qanorluunniit ajunngitsigigaluarpata aningaasanut inatsimmit allaannerusumik Naalakkersuisut iliuuseqarniarunik eqqaamasussaavaat sioqqutsisumik akuersissuteqartoqareertinnagu aningaasartuuteqarnanilu aningaasanik atuisoqarsinnaanngitsoq, tamannalu atuutsinneqartariaqartoq Aningaasaqarnermut Ataatsimiititaliap sukumiisumik sulisimaneratigut Naalakkersuisut 2012-mi arlaleriarlutik misigisimavaat.

Suliassa qarfinnummi ataasiakkaanut pulatinngikkaluarluta maluginiarparput suliat 55-it aningaasaliissutit tungaatigut kinguneqartut suliarineqarsimasut.

Taakkunangga suliassat 52-it Aningaasaqarnermut Akileraartarnermullu Ataatsimiititaliamut suliassanngortinneqarsimasut, 48-it akuersussutigineqarsimapput suliassallu pingasut Ataatsimiititaliamit itigartinneqarsimallutik.

Maanna ilisimalereerparput Nunatta Karsiata Naatsorsuutaasa ersersikkaat naatsorsuutigisamit pitsaannerusumik angusaqartoqarsimasoq, tamannali tuppallersaatissaanngilaq, aningaasammi ilarpassui inuiaqatigiinni sulisitassaagaluit nunatta karsianiitiinnarneqarsimanerannik annertuumik pissuteqartut nalunngilarput.

Naggataatigut ATASSUT-mit Naalakkersuisut qinnuigissavagut ilassutitut aningaasaliissutitut siunnersuummi kalaallisuuani qupperneq 23-mi qallunaatuuanilu qupperneq 22-mi 2011-mut innersuussineq iluarseqqullugu matumanimi ukioq 2012 pineqarpoq.



ATASSUT INATSIARTUNI

Taamatuttaa q siunnersuutip quleqtaa inaarutaasumik taasissutigineqartinnagu eqqortuusariaqarmat Naalakkersuisut qinnuigissavagut iluarseqqullugu, Inatsisartummi siunnersuutiginnilaat, quleqtaq eqqortoq tassaammat “Inatsisartut ilassutitut aningaasaliissutinut inatsisissaannut siunnersuut 2012”.

Taamatut oqaaseqarluta ATASSUT-mit kaammattuutigissavarput teknikkikkut iluarsisassamerngit eqqarsaatigalugit siunnersuut aappassaaneerneqartinnagu Inatsisartut Aningaasaqarnermut Akileraartarnermullu Ataatsimiititaliaannut suliassanngortinneqassasoq.